



阮的查某囡愛照鏡

阮的查某囡，這馬拄仔度睍外，已經會走會跳，閣會曉peh懸peh低。啊若講話是咿咿喔喔(inn-inn-onn-onn)，上恰意的是——逐擺我若是共伊洗身軀了後，都猶未穿衫，伊就走去鏡仔的頭前，笑咪咪閣搖尻川花。

我毋知影阮查某囡是對(uí)啥物時陣對照鏡遮有趣味的，我嘛毋知影是按怎伊nā會遮爾愛照鏡咧？我共伊想想咧，無的確(tik khak)是伊看著我穿衫的時佇鏡仔頭前，轉來覷去誠趣味；抑是點水粉抹胭脂的時，這引照彼引看誠好耍；嘛無的確是拄仔好我佇咧挖鼻空予伊看著，伊攏感覺誠心適。所擺，伊自按呢開始恰意照鏡看伊家己。

講著阮查某囡照鏡的趣味是規大堆，算都算袂離。

若上蓋心適的一擺，是家己提棉被幔(mua)佇身軀頂，行來行去。繼lueh，閣走去鏡的頭前，咿咿喔喔(inn-inn-onn-onn)一句話都講袂明搖來搖去。阮大家看恰是真趣味，共伊拍嘆仔兼觸舌。阿公嘛予伊的金孫弄甲笑咪咪。伊的阿爸看著按呢，喙笑目笑誠歡喜。

這馬，阮查某囡一工一工漸漸仔大漢，沓沓(tauh-tauh)仔捌代誌，毋若愛照鏡，閣愛迫迫耍物件。伊愛耍的物仔大項細項規厝間，逐日逐項攏愛耍一遍，就因為按呢，阮規家伙仔實在是真無閒。上蓋慘的是我，煞著逐工攏愛和伊佇鏡的頭前搬演。若無，伊就毋願好禮仔睏眠床頂。

看著阮查某囡遐爾活潑闊古錐，我的心肝是真歡喜。向望伊大漢了後，拄著困難的時，會使想著伊細漢照鏡的彼款快樂恰趣味，按呢就袂予困難拍敗去，做一个予人放心的好囡兒。

創作理念

偶然間看著我家寶貝這些令人覺得有趣的動作，不知不覺她已漸漸長大。當我寫下這幕情景，許多甜蜜更上心頭。創作的初衷，只想將那有趣的畫面化作永恆的回憶，與兒共有的甜蜜回憶。

李定錦

屏東縣崁頂鄉港東國小教師

